

Lo ciel l'est bleu. Lo solei l'est tsaat.

In de lo nèt le-s-ommo di veulladzo, comme se baillissan lo mot, se beutton à intsaplé la fa : Ta-Ta-Ta. Semble un concert di greillon quand s'approtse la nèt.

Lo lindeman, à l'arba di matin, le-s-intsaplo dessu n'épala, la fà dessu l'atra et lo cosé dessu lo cu, s'en vant seyé lo fen : Cra-Cra-Cra.

Le fenne lo épatton et fan le mieuve su lo bord di ru, di tsemin ou à l'entor di-s-abro, di roc et di boueisson.

Le fenne de mèison porton le soye dedin un tsaven de vouable, 'na gorbeille de sadzo ou dedin un séton que tégnon bien plan lo grilet plein de polenta grassa, de salade ou de trifolle à bocon.

Lo tot l'est topà atot 'na dzenta sarietta brodaye ou à pitset.

Lo bon flà di mindzé se repand son lo prà et ommo et fenne s'approtson tot content et s'achouatton à l'entor di grilet, mindzon leur fortesettaye et beyon dedin lo barlet.

Lo lindeman catson lo fen sec comme de coqueille.

Qui porte de lensolaye, de ballon, qui meine le fé, in balan, atot le-s-épion su lo greup di meulet.

« Hiù, Hiè, Poggia, Daré » crion le melatté que van, vegnon, se croueison pe le tsemin, tseut conten, comme se fusse 'na féta. La féta di travail. La féta de la première recolta de l'an.

Cit an cetta recolta l'est itae bonna.

« No feyen 'na pateura superba dzente » dion le campagnar.

« N'en de fen da rampli lo pailleur ».

« 'Na croaye couegne de prà no baille un fé de fen ».

Et s'en van et veugnon tot gai et lèi semble de senti dessu leur téta s'épatté la bénedechon de Dzeu.

Viva lo campagnar et sa sainte fategua.

« Hiù! Hiè! Poggia! Darè! »

Pouississe-t-écrié paré, tot content, à son meulet étot à la récolta di blà et à çalla di recos.